

Meeqqat atuarfianni immikkut atuartitsisarneq aamma allamik immikkut ittumik perorsaanikkut ikiorsisarneq pillugit Namminersorlutik Oqartussat nalunaarutaat nr. 21, 8. december 2017-imeersoq

Atuarfik pillugu Inatsisartut inatsisaanni nr. 15, 3. december 2012-imeersumi § 15, imm. 3 naapertorlugu aalajangersarneqarput:

Kapitali 1

Atorneqarfissaa siunertaalu

§ 1. Atuartunut, piginnaasamikkut ajornartorsiutaat ima ippata imaluunniit ima annertussuseqarpata immikkut tapersorsorneqarnissaminnut pisariaqartitaat nalinginnaasumik atuartitsinikkut pissarsiaritinneqarsinnaanatik, immikkut atuartitsisoqassaaq aamma allamik immikkut ittumik perorsaanikkut ikiorsiisoqassalluni.

Imm. 2. Atuartut atuarfinni imm. 1 naapertorlugu naammattumik annertussusilimmik ikiorserneqarsinnaanngitsut, Atuarfik pillugu Inatsisartut inatsisaanni § 25-mi atuartut angerlarsimaffiini, kollegiani imaluunniit atuartunut nerisaqarfigiitigalugu inissiani immikkut aaqqissuussani ineqarnissamut neqeroorfigineqartassapput.

§ 2. Immikkut atuartitsisarnikkut aamma allamik immikkut ittumik perorsaanikkut ikiorsiisarnikkut siunertaavoq,

- 1) meeqqat atuarfiata siunertaa tungaviilu naapertorlugit atuartup ineriartornerata ilikkariartorneratalu siuarsarneqarnissaa,
- 2) atuartup nalinginnaasumik atuartitsinermut peqataasinnaaneranut periarfissai sapinngisamik pitsaanerpaat, atuartup pisariaqartitaanut iluaqutaasut pilersissallugit, aamma
- 3) atuartup atuarfimmiit inuiaqatigiinnut, ilinniakkamut inuussutissarsiornermullu sammisamulluunniit allamut ikaarsaarnissaa tapersersussallugu.

Kapitali 2

Annertussusaa imarisaalu

§ 3. Immikkut atuartitsisarnermut aamma allamik immikkut ittumik perorsaanikkut ikiorsiisarnermut ilaapput:

- 1) Meeqqat atuarfianni atuartitsissutinik atuartitsissutinillu qanitariissunik, atuartup ilikkagaqarsinnaanermigut periarfissai piginnaasaalu immikkut isiginiarlugit aaqqissuussanik, atuartitsineq, tak. § 4, imm. 2.
- 2) Piginnaasaqariaatsinik suleriaatsinillu atuartitsineq sungiusaanerlu, atuartup tarnikkut, timikkut, inooqataanikkut, attaveqatigiinnikkut, eqqarsarnikkut, misigissutsikkut maluginiutitigullu

piginnaasaqarnissamut periarfissaanik ineriartortitsinerup siuarsarnissaa siunertaralugu.

3) Atuartunut angajoqqaanullu, ilinniartitsisunut allanullu, sulinerat atuartup ineriartorneranut annertuumik pingaarutilinnut, immikkut ittumik perorsaanermut siunnersuineq.

4) Atuartitsinerup atortussat immikkut ittut teknikkikkullu iluaqusersuutit atuartup atuartitaaneranut atatillugu pisariaqartinneqartut.

5) Atuarnermut atatillugu suliassatigut, inuttut naammassisassatigullu ajornartorsiutit qaangernissaannut tapersersuutaasinnaasumik atuartumut inuttut ikiorsiineq.

6) Inuiaqatigiinnut, ilinniakkamut, inuussutissarsiummut sammisamulluunniit allamut ikaarsaariarnermi atuartup namminersorsinnaaneranut imminullu ikiorsersinnaaneranut inuttut siunnersorneqarneq.

§ 4. Immikkut atuartitsisarnerup aaqqissuunneqarnera allatullu immikkut ittumik perorsaanikkut ikiorsiineq, taamatuttaaq ilinniartitseriaatsinik, suleriaatsinik periutsinillu atuartup pisariaqartitaanik toqqaaneq, pisinnaasaanik ilikkarniarnikkullu piginnaasaqarfigeriigaanik aallaaveqassapput, tak. imm. 2., aaqqissuussinerlu atuartumut pitsaanerpaaqqullugu tamanna pissaaq atuartoq sapinngisaq tamaat annerpaamik peqataatillugu atuartullu kissaatai eqqarsaatigalugit.

Imm. 2. Atuartup ilikkarniarneranut piunmassaqaatit ilaatigut tassaapput suliassatigut, naammassisassatigut inuttullu nukittuffiit. Piginnaasaqarfii nalilerneqassapput, Atuarfik pillugu Inatsisartut inatsisaanni § 38, imm. 1, nr. 4 naapertorlugi perorsaanermut aamma tarnip pissusaanut tunngasunik siunnersuinerup ingerlatsiffiusumit (Siunnersuisarfik). Tamanna perorsaanikkut aamma tarnip pissusaanut tunngasunik nalilersuinnikkut pissaaq, ajornanngippat meeqqanut tarnip nakorsaanik peqqinnissaqarfimmiluunniit sulisunik allanik suleqateqarnikkut.

§ 5. Immikkut atuartitsineq ilinniartitsisunit immikkut atuartitsinerup ilinniarsimasunit allatulluunniit piginnaasanik pisarialinnik peqartunit ingerlanneqartassaaq.

Imm. 2. Perorsaat allallu naleqquttumik ilinniagaqarsimasut atuartut angerlarsimaffiini, ilinniartut najugaqarfiini atuarfinnilu nerisaqarfutigisuni immikkullu perorsaanikkut suliagarfiusuni perorsaanikkut suliniuteqarsinnaapput.

§ 6. Immikkut atuartitsineq aamma allamik immikkut ittumik perorsaanikkut ikiorsiisarneq ima iliorluni pisassaaq:

1) Inimi atuarfiusumi taassumaluunniit avataani kisimiilluni tapersersorneqarnikkut.

2) Inimi atuarfiusumi taassumaluunniit avataani eqimattami tapersersorneqarnikkut.

3) Akunnerni piffissanilu ataasiakkaani kisimiilluni atuartinneqarnikkut.

4) Piffissani sivikitsukkaani atuartitsissutini tamarmiusuni kisimiilluni atuartinneqarnikkut.

5) Akunnerni piffissanilu ataasiakkaani eqimattami atuartinneqarnikkut.

6) Piffissami sivikitsumi atuartitsissutini tamarmiusuni eqimattami atuartinneqarnikkut.

7) Atuarneq tamaat atuarnerulluunniit annersaani atuaqatigiinni atuartunut immikkut atuartinneqarnissamut allatulluunniit immikkut ittumik perorsaanikkut ikiorserneqarnissamut pisariaqartitsisunut pilersinneqarsimasumi atuartinneqarnikkut (specialklassi).

8) Atuarfinni immikkut ittuni atuarfiilluunniit immikkoortortaani immikkut pilersitani atuartinneqarnikkut.

9) Ulluunerani aamma ulloq unnuarlu neqeroorutini, Naalakkersuisut pilersitaanni akuerisaanniluunniit

atuartinneqarnikkut.

Imm. 2. Immikkut atuartitsineq aamma allamik immikkut ittumik perorsaanikkut ikiorsiisarneq atuartitsissutini ataasiakkaani, atuarnep ilaani imaluunniit atuarnermi tamarmiusumi pisinnaavoq. Immikkut atuartitsineq aamma allamik immikkut ittumik perorsaanikkut ikiorsiisarneq meeqqat aturfiani atuartitsissutaasuni tamani atuartitsissutinilu qanitariissuni tamarmiusuni atorneqarsinnaavoq.

Imm. 3. Immikkorluinnaq peqqutissaqanngippat atuartoq sivikitsuinnarmik kisimiisillugu atuartinneqartariaqarpoq taamaallaallu piginnaasamigut ajornartorsiutai ima ippata atuaqatigiinnut specialklassimulluunniit akulerutsinneqarsinnaanani, imaluunniit pissutsit immikkorluinnaq itut pequtaappata.

Imm. 4. Ilinniartitaanermut ,Kultureqarnermut, , Ilisimatusarnermut Ilageeqarnermullu Naalackersuisoqarfik immikkut atuartitsinermik aamma allamik immikkut ittumik perorsaanikkut ikiorsiissutinik imm. 1-imi pineqartunit allaanerusunik akuersissuteqarsinnaavoq.

Kapitali 3

Ingerlatseriaaseq ingerlaneralu

§ 7. Atuaqatigiit ilinniartitsisuata, atuartulluunniit ilinniartitsisuisa allat imaluunniit aturfimmi sulisut meeqqamut attuumassuteqartut allat iliuuseqarnerisigut perorsaanikkut tarnikkullu atukkat aturfup pisortaannut perorsaanikkut tarnillu pissusaanik naliligassatut innersuussutigissavai, imaappat:

- 1) atuartup atuartulluunniit arlallit immikkut atuartitaanissamut pisariaqartitaat aamma immikkut ittumik tapersorsorneqarnissamut pisariaqartitaat nalinginnaasumik atuartitsinerup iluanni atuartitseriaatsinik atuartunut tulluusaanikkut, eqimattakkaartitsinikkut eqaatsumilluunniit pilersarusiornikkut ingerlanneqarsinnaanngippata, imaluunniit
- 2) atuartup atuartulluunniit arlallit ataatsimut isigalugu inissisimanerat annertuumik ernumanartoqartinneqarpat.

Imm. 2. Innersuussusiortoqartinagu atuartup atugarisai atuartulluunniit pineqartut atugarisaat pillugit, atuartunut pineqartunut, pineqartut angajoqqaavinut, atuartullu pineqartut ilinniartitsisuinut pissutsit oqaloqatiginnissutigineqareersimassapput.

Imm. 3. Innersuussineq paasissutissanik makkuninnga minnerpaamik imaqassaaq:

- 1) pissutsit ajornartorsiutaasut ikiorserniarlugit atuartorlu pineqartoq imaluunniit pineqartut ineriartornerat ilikkariartornerallu siuarsarniarlugu sunik aallartitsisoqareersimanersoq,
- 2) atuartup atugarisaasa oqaloqatigiissutigisarsimanerinek inerniliineq, tak. imm. 2, aamma
- 3) apeqqutit tigussaasut perorsaanikkut tarnillu pissusaanut tunngassuteqartut, pissutsinik innersuussinermi tunngaviusunik aallaaveqartut .

§ 8. Atuartup atuartullu angajoqqaavisa nammineerlutik atuaqatigiit ilinniartitsisuat qinnuigisinnaavaat, atuartup atugaanut perorsaanermut tarnillu pissusaanut tunngasunut atatillugu, perorsaanikkut tarnikkullu atuartup pisariaqartitaasa nalilersorneqarnissaat siunertaralugu.

Imm. 2. Qinnuiginninneq tunngavigalugu atuaqatigiit ilinniartitsisuat tamanna pillugu inassuteqaateqassaaq, § 7, imm. 2 aamma 3 takuuk.

§ 9. Atuarfiup pisortaa atuaqatigiit ilinniartitsisuata inassuteqaataa, angajoqqaat atuartulluunniit qinnuiginninneraneersinnaasoq tunngavigalugu perorsaanermut tarnillu pissusaanut tunngasunik Siunnersuisarfimmi naliliisoqarnissaanik innersuussissaaq. Kiisalu atuarfiup pisortaa perorsaanermut tarnillu pissusaanut tunngasunik pissutsit paasissutissat atuartup atuarfimmi allatsinnerata nalaani pigineqartut tunngavigalugit nalilersuisoqarnissaanut innersuussisinnaavoq.

§ 10. Perorsaanermut tarnillu pissusaanut tunngasunut nalilersuinissamut innersuussineq atuaqatigiit ilinniartitsisuata innersuussinerata saniatigut peqqinnissaqarfimmiit oqaaseqaammik ilaqartassaaq, atuartup imaluunniit atuartut pineqartut peqqissutsimikkut inissisimanerat ineriartornerallu pillugit, tamatumunnga ataavartumik nappaatit, tappissusiat tusaasinnaassusiallu ilanngullugit.

Imm. 2. Angajoqqaallu tamatumunnga akuersisimappata isumaginnittoqarfimmiit oqaaseqaammik ilanngussisoqarsinnaavoq.

§ 11. Siunnersuisarfiup atuarfiup pisortaata inassuteqaataa tunngavigalugu perorsaanikkut tarnillu pissusaanut tunngasutigut pissutsit innersuunneqartut nalilersortittassavai, Siunnersuisarfiup naliliinermini atuartumut atuartunulluunniit pineqartunut pitsaanerusoq aallaavigisassavaa.

Imm. 2. Siunnersuisarfik atuarfiup pisortaanut allaganngorlugu oqaaseqaateqassaaq, perorsaanikkut tarnillu pissusaanut tunngasutigut nalilersuineq tunngavigalugu. Ilutigitillugu taassuma assilinera angajoqqaanut atuartumullu nassiunneqassaaq.

Imm. 3. Siunnersuisarfik naliliippat pissutsit innersuunneqartut atuartumut ataatsimut arlalinnuunniit immikkut ittumik atuartitsinikkut immikkulluunniit perorsaanikkut ikiorsiinikkut pissusissamisoornerpaamik ikiorserneqarsinnaasut, oqaaseqaat immikkut atuartitsisoqarnissaata ilusissaanik annertussusissaanillu siunnersuummik imaqassaaq, pingaarnertut siunertaralugu nalunaassallugu atuartitsineq tamarmi atuartitsinerulluunniit annersaa immikkut atuartitsinerunersoq imaluunniit immikkut ittumik perorsaanikkut ikiorsiinerunersoq.

Imm. 4. Siunnersuisarfiup nalilerpago pissutsit innersuunneqartut immikkut atuartitsinikkut immikkulluunniit perorsaanikkut ikiorsiinikkut pissusissamisoornerpaamik ikiorserneqarsinnaangitsut, oqaaseqaat pissutsit qanoq pitsaanerpaamik ikiorserneqarsinnaanerinek siunnersuinermik ilaqartinneqassaaq.

§ 12. Siunnersuisarfiup allaganngorlugu oqaaseqaataa tunuliaqutaralugu atuarfiup pisortaa aalajangiissaaq perorsaanikkut suliniutissanik aallartitsisoqassanersoq, aammalu taakkua qanoq iluseqartinneqassanersut, perorsaanikkut tarnillu pissusaanut tunngasutigut naliliisimanermik tunngaveqartunik, tamatumunnga ilanngullugu immikkut atuartitsinermik aamma allanik immikkut perorsaanikkut ikiorsiissutaasussanik aallartitsisoqassanersoq.

Imm. 2. Immikkut atuartitsinermik aallartitsinermi, aamma allanik immikkut perorsaanikkut ikiorsiissutinik aallartitsinermi, atuaqatigiit ilinniartitsisuata aamma ilinniartitsisut tamatumunnga attuumassuteqartut atuartup angajoqqaavinik atuartumillu isumasioqateqareernikkut, atuartunut ataasiakkaanut atuartitsinissamut pilersaarummik suliaqassapput.

Imm. 3. Atuartumut naatsorsuussamik atuartitsinissamut pilersaarussiaq minnerpaamik makkuninnga imaqassaaq:

- 1) Atuartup tunngavigisai pisariaqartitaalu, atuartup nukittuffii pingaartillugit.
- 2) Paasissutissat paasisallu pissutsinut tunngavigisanut atugaasunullu tunngasut, atuartup

ineriartoqqinnissamat periarfissaanut pingaaruteqartut.

3) Siunertat, anguniakkat anguniakkallu immikkoortitaarneri immikkut atuartsinermi atugassarititaasut allamillu immikkut ittumik perorsaanikkut ikiorsiineq, kiisalu imarisai, sivisussusii, atuartsinermi periaasissat iluserititassat atortussallu.

4) Immikkut atuartsinerup allamillu immikkut ittumik perorsaanikkut ikiorsiissutit qanoq nalilersorneqartarnissaat uppersaasarsortarnissaallu.

§ 13. Atuartoq, atuarfiup ingerlaannartumik iliuseqarfigisariaqagaanik immikkut ajornartorsiornartumik inissisimappat, immikkut atuartsineq aamma allamik immikkut perorsaanikkut ikiorsiineq atuartup atugai pillugit atuatumik, angajoqqaavinik atuartullu ilinniartitsisunik oqaloqateqarnerup kingornatigut qaqutigooraluartumik atuarfiup pisortaanit erniinnartumik aallartinneqarsinnaapput.

Imm. 2. Angajoqqaat imm. 1. naapertorlugu atuatumut atugassarititaasunik oqaloqatiginnissuteqarumangippata, immikkut atuartsineq imaluunniit allamik immikkut perorsaanikkut ikiorsiineq atuatumik ilinniartitsisuinillu oqaloqateqareernerup kingorna atuarfiup pisortaanit erninnaartumik aallartinneqarsinnaapput.

Imm. 3. Imm. 1. aamma 2. naapertorlugit erninnaartumik immikkut atuartsinermik immikkulluunniit perorsaanikkut ikiorsiinermik aallartitsineq ullunit atuarfiusunit 15-init katillugu sivisunerussatut nalilerneqarpat, angajoqqaat allakkatigut nalunaarfigineqassapput piaarnerpaamillu § 7, imm. 3 naapertorlugu innersuussusiortoqassaaq.

§ 14. Immikkut atuartsineq aamma allamik immikkut perorsaanikkut ikiorsiineq aallartinneqarsimasoq, atuartullu tamatumani pissarsiarisai ingerlaavartumik nalilersorneqartassapput, atuartup siumut sammisumik pisariaqartitaasa nalilersorneqarnissaannik siunertaqartumik, tak. imm. 2-3.

Imm. 2. Atuartup atuaqatigiinnut ilinniartitsisuata ilinniartitsisullu allat attuumassuteqartut akuttunerpaamik qaammatit allortarlugit perorsaanikkut pilersaarusiornermut ataatsimeeqatigiittassapput, tassanilu ataasiakkaanut atuartsinermut pilersaarutit aaqqissuunneqartassapput nalilersorneqartarlutillu.

Imm. 3. Atuarfiup pisortaa, atuartup atuaqatigiinnut ilinniartitsisua ilinniartitsisullu attuumassuseqartut allat ukiup atuarfiusup qiteqqunnerani sullissinermit ataatsimiinneq ingerlattassavaat, tassanilu atuatumik atuartsinerup ingerlanera nalilersorneqartassalluni.

§ 15. Ingerlaavartumik nalilersuisarnek ingerlanneqartassaaq sapinngisamik atuartup atuartullu angajoqqaavisa sukumiisumik peqataatinnerisigut.

Imm. 2. Siunnersuisarfik pisariaqartitsineq naapertorlugu isumasiorneqartarsinnaavoq.

Imm. 3. Nalilersuinermit atatillugu peqqinnissaqarfimmiit, atuartup peqqissutsimigut ineriartorneranut tunngasutigut ilassutitut oqaaseqaatinik pissarsiniartoqarsinnaavoq. Angajoqqaat tamatumunnga akuersisimappata isumaginnittoqarfimmiit aamma oqaaseqaateqartitsisoqarsinnaavoq.

Imm. 4. Atuarfiup pissusissamisoortutut isigippagu Siunnersuisarfiup, peqqinnissaqarfiup inunnik isumaginnittoqarfiup oqartussallu susasaqartut attuumassutillit allat sinniisui aamma nalilersuinermit akulerunneqarsinnaapput.

§ 16. Immikkut atuartsinerup aamma allamik immikkut ittumik perorsaanikkut ikiorsiisarnerup

suussusissaa annertussusissaalu Siunnersuisarfiup minnerpaamik ukiumut ataasiarluni nalilertassavaa. Tamanna ingerlaavartumik nalilersuisarnikkut pisassaaq, tak. §§-it 14 aamma 15. Atuarfiup pisortaata qulakkiissavaa atortussat atuartup killiffianik atuartitsinermullu pilersaarutinut nassuiaasut Siunnersuisarfiup pissarsiarissagai.

§ 17. Atuarfiup pisortaata kommunalbestyrelsip immikkut atuartitsisarnermut killiliussaasa iluanni aalajangertassavaa ingerlaqqinnissaaq, allannguuteqartitsinissaaq imaluunniit immikkut atuartitsinerup aamma immikkut ittumik perorsaanikkut ikiorsiisarnepup aallartinneqarsimasup unitsinneqarnissaa. Tamanna pisassaaq immikkut atuartitsisarneq aamma immikkut ittumik perorsaanikkut ikiorsiisarneq pillugit Siunnersuisarfimmit nalilersuisimaneq tunngavigalugu.

Kapitali 4

Atuartunut ataasiakkaanut immikkut aaqqissuussinerit

§ 18. Atuarfiup pisortaata atuaqatigiit ilinniartitsisuannit inassuteqaat angajoqqaanit akuersarneqarneratigut atuartumillu tamanna pillugu oqaloqatiginninnerup kingorna, atuartup immikkut atuartitaanera imaluunniit immikkut ittumik perorsaanikkut atuartumut ikiorsiissutit allannguuteqartissinnaavai, atuartitsinermut allanut imaluunniit ikiorsiissutinut allanut, piffissami immikkut sivisussusilikkami. Allanguineq atuartitsissutinut ataasiakkaanut, arlaqartunut atuartitsissutinulluunniit qanitariissunut tunngasuusinnaavoq, piffissani aalajangersimasuni siunertalimmik allanguiffiusussatut isigineqartuni atuuttoq. Allanguineq ukiumut atuarfiusumut tamarmiusumut atuutissappat, atuarfiup pisortaata allanguinissamut pilersaarut allanguineq pitinnagu Siunnersuisarfimmut oqaaseqaateqarfigeqqullugu saqqummiutissavaa.

§ 19. Atuartoq immikkut atuartitaanermik imaluunniit allamik immikkut ittumik perorsaanikkut ikiorsiissutaasumik aaqqissuussiffigineqarsimappat, atuartitsissutinut ataasiakkaanut, arlaqartunut atuartitsissutinulluunniit qanitariissunut tunngatillugu, atuarfiup pisortaa uppersaasiinermut aamma atuartup angusaanut karakteriliinermut taarsiullugu allakkatigut oqaaseqaammik suliaqarsinnaavoq. Oqaaseqaat immikkut atuartitsinermi anguniagaasunik atuartup qanoq angusaqarsimaneramik tunngaveqassaaq, takukkit § 12, imm. 2 aamma 3.

Imm. 2. Uppersaasiineq aamma atuartup angusaanut karakteriliineq allakkatigut oqaaseqaammik taarserneqarpata, imm. 1 naapertorlugu, taanna atuartup inaarutaasumik soraarummeernerit uppersaataani ilanngunneqassaaq.

§ 20. Atuarfiup pisortaata, tak. imm. 2 aamma 3 immikkut atuartitsinermut imaluunniit allatut immikkut ittumik ikiorsiissutaasutut aallartinneqarsimasunut naapertuunnerpaatut isigineqarpat, Meeqqat Atuarfiat pillugu Inatsisartut inatsisaanni aalajangersakkat aamma aalajangersakkat taanna tunngavigalugu suliarineqarsimasut naapertorlugit, piffissamut atuarfiusussamut, ukiup atuarfiusup sivisussusissaanut, atuartitaanerpup pilersaarusionsarneqarneranut aaqqissuussaananerullu aamma alloriarfinni ataasiakkaani atuartitsinermut aalajangersakkat saneqqussinnaavai.

Imm. 2. Saneqqutsineq meeqqap soqutigisaanut iluaqutaanerpaassaaq imatullu aaqqissuunneqassanngilaq tamanna atuartup ingerlaqqilluni ilinniagaqarsinnaananeranut kinguneqarnerluutaasinnaalluni.

Imm. 3. Atuarfiup pisortaata saneqqutsinissamik aalajangernissamut isummernissaa pitinnagu, atuarfiup pisortaata atuartoq, angajoqqaat aammalu suleqatit attuumassutillit allat tamanna pillugu oqaaseqaateqarnissamik piumaffigissavai.

Imm. 4. Saneqqutsineq nalilersorneqarlunilu uppersaasarsorneqassaaq, tak. §§ 14-16.

Kapitali 5

Atuarfimmut allamut nuunneq

§ 21. Atuartoq immikkut atuartinneqartoq imaluunniit immikkut ittumik perorsaanikkut ikiorsiissutaasunik aaqqissuussiffigineqarsimasoq atuarfimmut allamut nuuppat, atuarfik taanna piaartumik atuartoq pillugu paasissutissamik atuartumut tunngassuteqartunik tamanik nassiussaqaassaaq, tamatumunnga ilanngullugu atuartumut iliiusissatut pilersaarussiaq, atuartumut tunngasumik mappi, atuartitsinermit pilersaarutit aamma nalilersuisarsimerit. Atuarfiup qimalikkap atuarfillu tikitassap atuartoq atuarfimmut allamut nuutsinnagu, atuartup angajoqqaavi atuartorlu isumasiorlugit atuartup atuarnerminik ingerlaqqinnissaa piareersassavaat qulakkiissallugulu atuarfimmi tikitamini atualernerminiit immikkut atuartitsineq imaluunniit immikkut ittumik perorsaanikkut ikiorsiineq pisariaqartitani nangillugu pissarsiarisassagaa.

Kapitali 6

Atuartuunerup naanera

§ 22. Atuartuuneq naappat atuarfiup inassuteqaataasimasut kommunimilu perorsaanikkut tarnillu pissusaanut tunngasuni innersuussinerit kiisalu ukiuni tallimani atuartitaanermit pilersaarutit toqqortarissavai, tamatumalu kingorna Siunnersuisarfimmut utertillugit.

Imm. 2. Atuartoq atuartitaanerup naanerani suli immikkut ittumik ikiorserneqartarnissamik pisariaqartitsippat, atuarfiup pisortaata akisussaaffigaa atuartup angajoqqaavisalu tamanna pillugu periarfissamik paasissutissinneqarnissaat. Atuarnerup ingerlaqqiffigisinnaasaanik, siunnersorneqarnissamut pisinnaatitaaffiinik inuussutissarsiornikkullu periarfissaanik.

Kapitali 7

Maalaaruteqarneq

§ 23. Nalunaarut una malillugu atuarfinni ataasiakkaani aalajangiunneqarsimasut aalajangiinerup nalunaarutigineraniit sapaatit akunneri sisamat qaangiutsinnagit kommunalbestyrelsimut maalaarutigineqarsinnaapput.

Kapitali 8

Atortuulerfia

§ 24. Nalunaarut atuutilissaaq 1. aggusti 2018.

Imm. 2. Ilutigitillugu meeqqat atuarfianni immikkut atuartitsisarneq aamma allamik immikkut ittumik perorsaanikkut ikiorsiisarneq pillugit Namminersornerullutik Oqartussat nalunaarutaat nr. 22, 23. juuli

1998-imeersoq atorunnaarsinneqassaaq.

Namminersorlutik Oqartussat, ulloq 8. december 2017

Doris J. Jensen

/

Lone Nukaaraq Møller